

忻州直隸州志

允

定生題



忻州志卷三十八

知忻州直隸州事方戊昌編輯

藝文下

詩賦

行忻代間

宋范仲淹

數年風土塞門行
說著江山意暫清
求取罷兵南北去
滿樓蒼翠足生平

述懷

何宏中

馬革盛尸每恨遲
西山餓踣更何辭
姓名不到中興歷
付與皇天后土知

凌雲臺

在東門外磨臺上

李中立

山圍平野四迴環天迴臺高眼界寬雲漏殘陽明遠岫濤
翻急雨漲前灘一川勝趣四時好千里雄風三伏寒誰見
凌雲清絕處夜涼空翠溼闌干

題繫舟山圖

裕之先大夫嘗
居此山之東巖

金趙秉文

山頭佛屋五三間山勢相連石嶺關名字不經從我改便
稱元子讀書山

李平甫爲裕之畫繫舟山圖閑閑公有詩某亦繼作

楊雲翼

名利走朝市山居良獨難況復山中人讀書不求官東巖
有佳致書室方丈寬彼美元夫子學道如觀瀾孔孟澤有

餘曾顏膏未殘向來種德深直與山根蟠之子起其門孤
鳳騫羽翰計偕聊復爾平步青雲端揭來遊京師士子拭目
觀禮部天下士文盟今歐韓一見折行輩殆如平生歡
舞雩詠春風期著曾黜冠五言造平淡許上蘇州壇我嘗
讀子詩一唱而三歎世人非無才多爲才所謾高者足詆
訶下者或辛酸吾子忠厚姿不受薄俗漫晴雲意自高淵
水深無滯他日傳吾道政要才行完會使茲山名與子俱
不刊

贈石德固

張翰

西湖之月清無塵橘中之樂猶避秦向來所見止此耳渠

亦豈是真知津如君眼孔乃許大萬事付之塵甑墮兒能
詩書又肯播著脚世間看踏破青巾玉帶桃李花日斜空
望紫雲車布衣誰識隱君子一馬癯然何處家

家園假山

元德明

八尺飛來峰蒼然立於獨細看甲乙字疑是平泉族山非
一草石見石山亦足便恐東岫雲來我簷下宿今朝鑿盆
池明朝種松菊自笑住山人何時返巖谷

贈答程彥文

剝啄誰叩門開門得吾友握手一大笑慰我離羣人之子
富才具事業可力取瞻望青松姿衰遲愧蒲柳金閨滿鴛

鷺什伯自爲偶寂莫林野人過從但鄰叟盤飧無兼味
蒧才適口窮達俱偶然相逢且杯酒

寒食再遊福田寺

春山寂寂掩禪扉複嶺盤盤入翠微布韞青鞵供勝踐
粥魚齋鼓薦元機日烘幽徑綠煙煖風定曉枝紅雨稀
曾是西堂讀書客不應啼鳥也催歸

秋莫王氏園亭

細徑雲林底危亭澗水湄秋先殞黃葉寒未老紅葵嚼
句幽禽答尋花晚蝶隨無人共幽興思與野僧期

山園梨葉有青紅相半者戲作一詩

少志 卷三 三
霜輕霜重偶然中一葉雖殊萬葉同不信世間閒草木解
隨兒女作青紅

憶山中二絕句

東寺留連飲張園爛漫遊兒童望歸路一日幾登樓
秋色山中好山翁醉不迴不知籬下菊霜後幾叢開

同東巖元先生論詩

王敏夫

林逋仙去幾來年驚見梅花第二篇千歲冰霜松骨瘦九
秋風露鶴聲圓騰輝定出連城上得趣知從太古前邂逅
茅齋話終夕只疑人世改桑田

題裕之樂府後

王中立

常恨小山無後身
元郎樂府更清新
紅裙婢子那能曉
送與凌煙閣上人

題裕之家山圖

趙元

繫丹盤盤連石嶺
牧馬徽徽倒山影
山光水氣相混涵
中有元家舊廬井
雁門一開豺虎場
駕言投迹嵩之陽
青山偃蹇不可將
十年竟墮兵塵黃
東巖風物知猶在
說與寄庵神已會
一揮淡墨能似之
清輝遠寄形骸外
元家故山吾與鄰
夢見不如畫圖真
舊曾行處聊經眼
未得歸時亦可人

讀裕之弟詩藁

有鶯聲柳巷深之句漫題三詩其後

元好古

阿翁醉語戲兒癡說著蟬詩也道奇吳下阿蒙非向日新
篇爭遣九泉知

鶯藏深樹只聞聲不著詩家畫不成慚愧阿兄無好語五
言城下把降旌

傳家詩學在諸郎剖腹留書死敢忘
先人臨終有剖背上腹留書之語
錦囊三箭在直須千古說穿楊

送張安中還雲中
名保極雲朔名士

孫益

相送還相送臨分手重分驂驢欣得路鴻雁惜離羣木落
黃華露城低紫塞雲中秋月正好千里謾思君

元氏桂軒爲敏之賦

王萬鍾

簾捲堂前桂子涼一軒燈火夜初長月中春好元無價天上風來別有香棠棣一家同映秀詞林百世繼餘芳閒花野草空無數掩盡人間獨擅場

學東坡移居八首

元好問

廢地三畝餘十年長蒿萊瓦礫雜糞壤白骨深蒼苔孤客無所投卽此營茅齋壑斷豈不苦寢處亦可懷辱身賤者事甯當惜筋骸伐木荒林中運甕古城隈辛勤八十日吾事乃得諧買宅必萬錢一錢不天來今晨見此屋一笑心顏開

誰謂我屋寬寢處無復餘誰謂我屋小十口得安居南榮

坐諸郎課誦所依於西除著僮僕休休得自如老我於其
間兀兀窮朝晡起立足欠伸偃卧可展舒窗明火焙煖似
欲忘囚拘屋前有隙地客舍不可無花欄及菜圃次第當
耘鋤東野載家具家具少於車我貧不全貧尙有百本書
故書堆滿床故物貯滿箱渾渾商寶鬲纍纍漢銅章杖節
昭敬恭嚴卯訶痺剛雷文繞杖節獸面出佩瑛私印刻王
尊玉斗蛟龍翔逸少留半紙魚網非硬黃亦有鬘首帖不
辦作雁行雪景睿思物宣政舊所藏晉公古漁父浩歌濯
滄浪因觀宮騎圖卧馳識提囊谿石含餘潤奚墨凝幽香
南榮挂風響雲裾佩鏘鏘鏡背先秦書八字環中央讀之

三嘆息此日何時光

壬辰困重闔金粟論升勺明年出青城瞑目就東縛毫釐
說鬼手攘臂留空藥聊城千里外張獵何所託諸公頗相
念餘粒分兒鶴得損不相償抔土填巨壑一冬不製衣繒
纒如紙薄一日僅兩食強半雜藜藿不差蓬累行粗識飄
飲樂敵貧如敵寇自信頗亦慙兒啼飯糲空堅陣爲屢卻
滄溟浮一葉渺不見止泊五窮果何神爲戲乃爾虐

舊隱嵩山陽筭蕨豐饒餉新齋浙江山水窮放浪乾坤
兩茅舍氣壓華屋上一從陵谷變歸顧無復望樵漁憶還
往風土夢閑曠恍如悟前身姓改心不忘去年住佛屋盡

室寄尋丈今年僦民居卧榻礙盆盎靜言尋禍本正坐一出妄青山不能隱俛首入羈鞅巢傾卵隨覆身在顏亦強空悲龍髯絕永負魚腹葬置錐良有餘終身志懲創

國史經喪亂天幸有所歸但恨後十年時事無人知廢興屬之天事豈盡乖違傳聞入讎敵祇以興罵譏老臣與存亡高賢死兵飢身死名亦滅義士爲傷悲哀淮西城萬夫甘伏尸田橫巨擘耳猶爲談者資我作南冠錄一語不敢私裨官雜家流國風賤婦詩成書有作者起本良在茲朝我何所營暮我何所思胸中有茹噎欲得快吐之湮薪煙滿眼破鏡冰生髭造物留此筆吾貧復何辭

東坡謫黃州符藥行江湖荒田拾瓦礫賤役分僮奴我讀
移居篇感極爲悲歔九原如可作從公把犁鋤我貧公亦
貧賦分無賢愚論人雖甚媿詩亦豈不如

此州多寓士論年悉肩隨風波同一舟奚必骨肉爲倪家
蓮花白每釀必見貽季昌妙琴事足以相娛嬉郭侯家多
書篇帙得徧窺趙子篤於學間以問所疑王生舊隣舍窮
達心不移千里訪存歿十口分寒飢獨有仲通甫天馬不
可羈直以論詩文稍稍窺藩籬永懷王與李朔漢行當歸
書來聞吉語報我脫縈維非一狐腋不直五羖皮我作
野史亭日與諸君期相從一笑樂來事無庸知

九日讀書山用陶詩露淒暄風息氣清天曠明爲韻

賦十詩

行帳適南下居人跼庭戶城中望青山一水不易渡今朝
川涂靜偶得展衰步蕩如脫囚拘廣莫開四顧半生無根
著筋力疲世故大似丁令威歸來歎墟墓鄉閭喪亂久觸
目異平素粉榆雖尙存歲宴多霜露

今日復何日霜氣倏已淒登高有佳招山中古招提翩翩
劉公子王田重相攜乾坤動詩興澗壑忘攀躋霍侯家甚
貧劣有酒與雞城居厭鼙鼓移家此幽棲世網不易逃所
向皆塵泥何以濯我纓林間有清溪

山腰抱佛剎十里望家園亦有野人居層崖映柴門昔我
東巖君曾此避塵喧林泉留杖履歲月歸琴樽翁今爲飛
仙過眼幾寒暄蒼蒼池上柳青衫見諸孫疏鐙照茅屋新
月入頽垣

二句先
人詩

依依覓陳迹惻愴不能言

霜氣一匱薄杳杳秋山空臨高望煙樹黃落雜青紅造物
故豪縱窮秋變春容錦障三百里不盡臺山東粲粲黃金
華羅生蒿艾叢野人不知貴幽香散秋風秋物自橫陳顧
揖苦不供誰能搖醉筆吐句凌清雄

宇宙有此山閱世過鳥疾何人不此遊名姓甯復識茲辰
世所重前代多盛集柴桑有故事二謝留俊筆併數孟與

桓此外誰記憶人生百年內踏地皆陳迹獨惟我輩人興懷念今昔山林與臯壤自古長太息

賞心古難并暮景日易費故人成此游尊酒重相慰新詩互醺唱清談見滋味鱣鯢方偃蹇鼃黽共騰沸懸險劇褒斜清渾雜涇渭爭教十圍腹滿貯憂與畏情親到真率甯復轉喉諱鄭重伯雅生藉汝聊吐氣

往年在南都閑閑主文衡九日登吹臺追隨盡名卿酒酣公賦詩揮灑筆不停蛟龍起庭戶破壁春雷轟堂堂髯御史痛飲益精明亦有李與王玉樹含秋清我時最後來四座頗爲傾今朝念存歿壯心徒自驚